



PANDUAN ADUAN INTEGRITI MAJLIS AGAMA ISLAM DAN 'ADAT MELAYU PERAK (MAIPK)

PENGENALAN

1. Majlis Agama Islam dan 'Adat Melayu Perak (MAIPk) menyediakan saluran untuk warga MAIPk dan orang awam membuat aduan integriti berkaitan perlakuan jenayah rasuah, penyelewengan, salah guna kuasa atau pelanggaran tatakelakuan dan etika organisasi. Unit Integriti dan Kualiti, Bahagian Khidmat Pengurusan MAIPk akan menapis, memproses, meneliti dan menilai maklumat atau aduan yang diterima sebelum tindakan selanjutnya.

Antara skop kesalahan yang boleh dilaporkan adalah seperti di Jadual Pertama, Bahagian II, Tatakelakuan, Enakmen Majlis Agama Islam dan 'Adat Melayu Perak (Tatatertib dan Surcaj) 2001.

- (a) Penyalahgunaan kuasa dan penyelewengan;
- (b) Memberi/ menerima/ meminta/ menawarkan rasuah;
- (c) Pelanggaran undang-undang, peraturan dan etika standard seperti berikut;-
 - Tidak hadir bertugas/tidak mematuhi Waktu Bekerja Berperingkat (WBB)
 - Gangguan seksual/berkhalwat/berkelakuan sumbang
 - Tidak melakukan pengisytiharan harta/ mengemaskini pemilikan harta baharu dan pelupusan harta lama
 - Penyalahgunaan dadah
 - Melakukan pekerjaan luar tanpa kebenaran Ketua Jabatan
 - Pergi ke luar negara tanpa kebenaran bertulis Ketua Jabatan
- (d) Pengurusan kewangan yang tidak cekap dan telah menyebabkan berlakunya pembaziran sumber MAIPk; atau
- (e) Tidak jujur/ tidak amanah/ tidak bertanggungjawab seperti berikut;-
 - Membuat tuntutan palsu
 - Mengemukakan sijil cuti sakit palsu
 - Membocorkan rahsia kerajaan/ maklumat terperingkat
 - Menyalahgunakan peralatan pejabat
 - Menyalahgunapakai kenderaan pejabat

PANDUAN MENYALURKAN ADUAN

2. Bagi maksud tersebut, aduan atau maklumat salahguna kuasa, jenayah dan pelanggaran tatakelakuan boleh diklasifikasikan sebagai berikut:
 - 2.1. **Salahlaku** iaitu apa-apa perbuatan atau ketinggalan yang merupakan kesalahan di bawah Enakmen Majlis Agama Islam dan 'Adat Melayu Perak (Tatatertib dan Surcaj) 2001 [Enakmen 4, Tahun 2001 dan peraturan-peraturan lain yang berkuatkuasa];
 - 2.2. **Penyalahgunaan kuasa** iaitu apa-apa ketidakpatuhan kepada peraturan semasa menjalankan kuasa di bawah undang-undang atau peraturan yang berkuatkuasa;
 - 2.3. **Jenayah Rasuah** iaitu termasuk apa-apa kesalahan meminta, menawarkan atau menerima suapan/rasuah, kesalahan tuntutan palsu, menggunakan jawatan dan kedudukan untuk mendapatkan suapan/rasuah seperti yang telah diperuntukkan dalam Seksyen 16, 17, 18 dan 23 Akta Suruhanjaya Pencegahan Rasuah Malaysia 2009 dan lain-lain kesalahan yang ditetapkan dalam Akta yang sama.

KAEDAH PENYALURAN ADUAN & MAKLUMAT

3. Mana-mana warga MAIPk atau orang awam boleh menyalurkan aduan atau maklumat salahlaku jenayah serta pelanggaran tatakelakuan dan etika organisasi kepada Unit Integriti melalui saluran berikut:
 - 3.1. Emel ke integriti@maipk.gov.my; atau
 - 3.2. Menghadirkan diri ke Pejabat Unit Integriti atau memanjangkan aduan tersebut secara bertulis ke Unit Integriti, Bahagian Khidmat Pengurusan MAIPk

PANDUAN MEMBERI MAKLUMAT BERKUALITI

4. Sila pastikan aduan dan maklumat itu tidak bersifat terlalu umum bagi membolehkan pihak Unit Integriti atau SPRM dapat mengambil tindakan sewajarnya. Kumpulkan maklumat yang diperolehi dan sampaikan isi penting seperti berikut:
 - **Bila kejadian berlaku (*when*)**
 - **Di mana kejadian itu berlaku (*where*)**
 - **Siapa yang terlibat dan yang boleh membantu (*who*)**
 - **Apa jenis kesalahan yang dilakukan (*what*)**
 - **Kenapa kesalahan tersebut dilakukan (*why*)**

- **Bagaimanakah transaksi rasuah atau pelanggaran tatakelakuan tersebut dilakukan (how)**
5. Sila sertakan nama dan maklumat diri anda. Unit Integriti boleh menerima aduan atau maklumat daripada pemberi maklumat yang tidak dikenali, tetapi adalah lebih baik sekiranya kami dapat menghubungi semula anda bagi membantu kami bertindak lancar dan pantas. Unit Integriti tidak dapat mengambil tindakan ke atas maklumat yang tidak lengkap atau terlalu umum dan tiada maklumat perhubungan untuk mendapatkan maklumat lanjut.
 6. Anda juga boleh mengetahui dan mendapat maklum balas mengenai status aduan atau maklumat anda sekiranya anda menyertakan nama dan maklumat seperti emel atau nombor telefon mudah alih.
 7. Pemberi maklumat adalah dilindungi di bawah undang-undang:
 - **Subseksyen 65(1), Akta Suruhanjaya Pencegahan Rasuah Malaysia 2009;**
 - **Seksyen 7, 8 dan 9, Akta Perlindungan Pemberi Maklumat 2010; dan**
 - **Akta Perlindungan Saksi 2009.**

BAGAIMANA ADUAN INTEGRITI BERFUNGSI

8. Aduan atau maklumat akan melalui proses saringan bagi mengenalpasti:
 - **Aduan/ Maklumat berunsur rasuah;**
 - **Aduan/ Maklumat boleh diambil tindakan; dan**
 - **Orang yang dituduh boleh dikesan/ dikenalpasti.**
9. Selepas proses saringan, aduan atau maklumat yang terpilih iaitu maklumat yang mencukupi berkaitan dengan tatakelakuan melibatkan salahlaku dan salahguna kuasa di bawah Jadual Pertama, Bahagian II, Tatakelakuan, Enakmen Majlis Agama Islam dan 'Adat Melayu Perak (Tatatertib dan Surcaj) 2001, Akta 605 atau undang-undang dan peraturan yang berkuatkuasa akan diambil tindakan oleh Unit Integriti.
10. Sekiranya maklumat tersebut adalah berkaitan **jenayah rasuah, kes tersebut akan dirujuk terus ke agensi penguatkuasaan (SPRM atau PDRM)** untuk tindakan lanjut.

PERLINDUNGAN KEPADA PEMBERI MAKLUMAT

11. **Subseksyen 65 (1) dan (2), Akta Suruhanjaya Pencegahan Rasuah Malaysia 2009**, telah memperuntukkan perlindungan kepada pemberi maklumat dan kandungan maklumat tidak boleh didedahkan oleh mana-mana orang termasuk tidak boleh didedahkan atau diperintahkan supaya didedahkan dalam mana-mana prosiding mahkamah, tribunal atau pihak berkuasa lain.

12. **Seksyen 7, 8 dan 9 Akta Perlindungan Pemberi Maklumat 2010**, turut memperuntukkan bahawa seseorang pemberi maklumat yang telah mendedahkan pelakuan tidak wajar pegawai termasuk rasuah atau salahguna jawatan dan kedudukan kepada SPRM atau penguatkuasa lain, beliau hendaklah diberi perlindungan maklumat sulit, kekebalan dari tindakan sivil atau jenayah atau tindakan tatatertib dan perlindungan terhadap tindakan yang memudaratkan.

KEWAJIPAN MELAPORKAN JENAYAH RASUAH

13. Adalah menjadi kewajipan untuk melaporkan pemberian, janji atau tawaran suapan rasuah oleh mana-mana orang. Kegagalan melaporkan sogokan rasuah adalah merupakan suatu kesalahan, yang jika disabitkan, boleh didenda tidak melebihi RM100,000 atau hukuman penjara tidak melebihi 10 tahun atau kedua-duanya sekali – **Subseksyen 25(1), Akta Suruhanjaya Pencegahan Rasuah Malaysia 2009**.

14. Sekiranya anda merupakan orang awam, adalah menjadi kewajipan untuk melaporkan permintaan, perolehan atau percubaan untuk memperoleh suapan oleh mana-mana orang. Kegagalan melaporkan permintaan rasuah adalah merupakan suatu kesalahan yang jika disabitkan, boleh dihukum penjara tidak melebihi 2 tahun atau denda tidak melebihi RM10,000.00 atau kedua-duanya. – **Subseksyen 25(3), Akta Suruhanjaya Pencegahan Rasuah Malaysia 2009**.

Saya yang menurut perintah,

.....
(SHAHRUL AZAM BIN SHAARI)
Ketua Pegawai Eksekutif
Majlis Agama Islam dan 'Adat Melayu Perak

Tarikh kemaskini :

14/8/23